

Pacan saluton el Koreio!



En Esperantio oni nomas min Ana Songanta kaj koree SHIN EUN-SOOK.

Mi estas instruistino de supermeza LLG (Libera Lernejo por Geknaboj).

Kio estas LLG? LLG estas alternativa lernejo kaj edukad-movado en Koreio. Ĉefe, pro alternativeco, mi eklernis Esperanton. Fine de la jaro 2006, kiam mi laboris en iu elementa LLG kiel ĉefino de geinstruistoj, nia lernejo cerbumis por serĉi alternativan fremdan lingvon koncerne al la temo <Paca mondo>. Finfine, ni trovis Esperanton ankoraŭ vivantan en la mondo! Kelkajn monatojn lerninte Esperanton, mi komencis fari animadon pri la paca lingvo Esperanto al niaj infanoj per kartoj, dancoj kaj ludoj.



- Esperanto kurso en elementa LLG

Poste mia familio havis projekton lasi urban vivon en Seulo kaj translokiĝi al kamparo por ĝui naturan vivon. Antaŭ la projekto, ni vojaĝis unu monaton en Herzberg, oficiale nomata Esperanto-urbo en Germanio. Dank'al la momento mi ekkonatiĝis kun multaj fremdlandaj esperantistoj. Post reveno en Koreion iu supermeza LLG dungis min kiel fakan instruiston pri Esperanto.

En nuna supermeza LLG, mi celas, ke adoleskantoj lernu Esperanton tri semestrojn kaj poste lanĉu E-vojaĝon por apliki la lingvon. En la jaro 2011, dek lernantoj (18 jaraĝaj) vojaĝis kun mi al Germanio kaj

Francio dum 45 tagoj. Kaj sekvan jaron mi kondukis aliajn al Ĉinio kaj Japanio. Ĉi-jare ankaŭ dek adoleskantoj preparas vojaĝon al Hungario kaj Slovakio. Dum la vojaĝo ili libere naĝas en esperantio. Kompreneble, kelkaj povus droni, tamen ĉe siaj kolegoj. Junuloj energie ĝuas ĉiaman momenton dum la vojaĝo interne de Esperanto aŭ ekstere de ĝi.



- Pluezek Renkontiĝo 2013



- La staĝo SES, Slovakio 2013

Kvankam mia historio pri Esperanto ne estas tiom longa, Esperanto donis al mi tiom da ŝancoj por puŝi horizonton. Jen estas miaj paŝoj kun Esperanto.

- vojaĝi al Herzberg (2009)
- vojaĝi al Francio, Germanio kun dek studentoj de LLG (2011)
- gvidi kurson kadre de Friska Lernejo, en Osaka, Japanio (2011)
- vojaĝi al Hispanio, Francio kun kvin koleginoj de LLG (2012)
- prelegi en Kansai-ligo, Japanio (2012)
- vojaĝi kun LLG lernantoj al Ĉinio, Japanio (2012)
- vojaĝi al Ĉeĥio, Slovakio (2013)
- gvidi kurson kaj prelegi en Pluezek renkontiĝo (2013)

Mi esperas, ke la prelegvojaĝo sendube donos al ni ambaŭ ŝancojn malkovri freŝan mondon kaj vidpunkton dank' al Esperanto. Mia koro jam tamburas renkonti vin!

Tutkore,  
Ana Songanta

## Temo de mia prelego :

### LLG & Esperanto, freŝa vento en Koreio!



- Esperanto kurso en supermeza LLG

Liberigita lernejo de la ŝtato,

Sen lernejestro,

Sen konkurado,

Sen ekzameno.

Kion vi povus imagi pri ĉi superaj asertoj? Jes, ili parte klarigas pri LLG en Koreio. LLG signifas jenon, Libera Lernejo por Geknaboj. En Koreio preskaŭ du cent LLG-j ekzistas kaj ilia historio komenciĝis antaŭ 20 jaroj.



- transdistanca E-kurso per skajpo en supermeza LLG



- E-vojaĝo de LLG-lernantoj en Parizo, 2011



- LLG-lernantoj kun ĉinaj studentoj en Ĉinio, 2012

LLG estas libera lernejo. Lernantoj rajtas elekti lecionojn, kiujn ili volas lerni. LLG celas, ke infanoj havu propran revon kaj faru tion, kion ili mem deziras. LLG estas alternativa vojo, kiu eliris el tro strikta edukad-sistemo. LLG inkludas al alternativa vivmaniero. Ili eĉ serĉas alternativan fremdan lingvon por pace komuniĝi kun tutmondanoj. Ĉu per la angla? Ĉu per la ĉina? Ne eblas, ke potenca lingvo rolus kiel neŭtrala lingvo inter homoj. Finfine LLG ekrenkontis pacan komunikilon, Esperanto. Nuntempe LLG-anoj komencas aktive lerni Esperanton. Kaj ili krias, ke Esperanto kaj LLG tre bone akordiĝas unu kun la alia.

Jen, mia prelego temas pri :

- Kio estas LLG en Koreio ?
- LLG ekinundas Esperanton
- LLG bredas revon

Dum la prelego vi povus renkonti aktivajn LLG-anojn, revplenajn junulojn, kiuj puŝas sin al pli fora horizonto kaj Esperanto transmisiĝas al LLG kun paca energio. Certe, vi konstatos, ke en Koreio jam vigle blovas freŝa vento, Esperanto & LLG.